


Ni Pangulong
Dieter F. Uchtdorf

Ika-duhang Manuglaygay sa
Unang Panguluhan



Ngaa Kinahanglan Naton sang mga Propeta?

Tungod palangga sang Langitnon nga Amay ang Iya mga kabataan, wala Niya sila ginpabayaan nga magpangabuhi sa sining mortal nga kina-buhi nga wala sing direksyon kag paggiya. Ang mga pinanudlo sang Langitnon nga Amay indi mga ordinaryo, mapakot-pakot, makit-an sa bisan diin lang nga libro nga sarang mabakal sa isa ka lokal nga balaligyaan sang mga libro. Ang mga ini kaalam sang makagagahum sa tanan, nakahibalo sang tanan nga selestiyal nga Tinuga nga nagapalangga sang Iya kabataan. Nalakip sa Iya mga pulong amo ang sekreto sang tanan nga dinag-on—ang yabi sang kalipay sa sini nga kalibutan kag sa kalibutan nga magaabot.

Ang Langitnon nga Amay nagapahayag sining kaalam sa Iya mga kabataan sa duta paagi sa Iya mga alagad nga mga propeta (tan-awa sa Amos 3:7). Gikan sa kapanahonan ni Adan, ang Dios nagpakighambal sa Iya mga kabataan paagi sa pinili nga mga manugham-bal nga ginsugo sa pagpahayag sang Iya pagbuot kag sa paglaygay sa iban. Ang mga propeta mga inspirado nga mga manunudlo kag sa masami mga hamili nga mga saksi ni Jesucristo (tan-awa sa D&C 107:23). Ang mga propeta nagapakighambal indi lamang sa katawhan sa ila panahon, kundi subong man sila nagapakighambal sa katawhan sa tanan nga panahon. Ang ila

mga pulong nagalanog sa tanan nga dinag-on bilang isa ka katipan sang pagbuot sang Dios sa Iya mga kabataaan.

Ang karon nga panahon wala sang kinalain sa ano man nga mga panahon sa nagliligad. Ang Ginuo wala nagapalangga sa mga katawhan sa aton panahon sing mas kubos sangsa mga katawhan sang mga nagliligad nga mga panahon. Ang isa sang mga mahimayaon nga mensahe sang Pagpanumbalik sang Simbahan ni Jesucristo amo nga ang Dios padayon nga nagapakighambal sa Iya mga kabataan! Wala Sia natago sa mga kalangitan kundi nagahambal sa karon [nga panahon] subong nga Sia [nagpakighambal] sa dumaan nga panahon.

Kadamoan sang mga ginapahayag sang Ginuo sa Iya mga propeta nagatuyo sa paglikaw sa aton sa kalisod bilang mga indibidwal kag bilang mga sosyedad. Kon ang Dios nagahambal, ginahimo Niya ini agud magtudlo, mag-inspirar, magpauswag, kag magpaandam sa Iya mga kabataan. Kon ginabalewala sang mga indibidwal kag mga sosyedad ang mga panulin sang ila Langitnon nga Amay, ginahimo nila ini sa risgo sang pagtilaw, pag-antus kag kabudlayan.

Ang Dios nagapalangga sa tanan Niya nga mga kabataan. Amo ina nga nagaalungay gid Sia sa aton paagi

sa Iya mga propeta. Kasubong nga luyag naton ang kon ano ang pinakamaayo para aton mga pinalangga, ang Langitnon nga Amay luyag man sang kon ano ang pinakamaayo para sa aton. Amo ina nga ang Iya mga panulin tuman ka importante kag kon kaisa tuman ka ginadalian. Amo ina nga wala Niya kita ginpabayaan sa karon nga panahon kundi padayon nga nagapahayag sang Iya pagbuot sa aton paagi sa Iya mga propeta. Ang aton kadangatan kag ang kadangatan sang aton kali-butuan nagadepende sa aton nga pagpamati kag pagtuman sa ginpahayag nga pulong sang Dios sa Iya mga kabataan.

Ang malahalon nga mga panulin sang Dios sa katawhan makita sa Biblia, sa Libro ni Mormon, sa Doctrine and Covenants, kag sa Pearl of Great Price. Dugang pa, ang Ginuo nagapakighambal sa aton paagi sa Iya mga alagad, subong nga himuong Niya sa liwat sa palaabuton nga pang-kabilugan nga komperensya.

Sa tanan nga ginalibban kon bala ina nga butang sarang matabo—ayhan mamangkot, “Possible bala nga ang Dios nagapakighambal sa aton sa karon nga panahon?”—sa bugos ko nga tagipusuon ginaagda ko kamo sa “pagkari kag pagtan-aw” (Juan 1:46). Basaha ang pulong sang Dios suno sa makita sa balaan nga mga kasulatan. Magpamati sa pang-kabilugan nga komperensya nga may dulungan nga handa sa pagpamati sa pulong sang Dios nga ginhataq paagi sa Iya mga propeta sa ulihing-mga-adlaw. Magkari, magpamati, kag magtan-aw nga ginagamit ang inyo tagipusuon! Kay kon kamo magpamangkot “nga may bunayag nga tagipusuon, sa matuod-tuod nga tinutuyo, nga may pagtuo kay Cristo, [ang Dios] ipakita Niya ang kamatuoran sini sa inyo, paagi sa gahum sang Balaan nga Espiritu” (Moroni 10:4). Paagi kag sa sining gahum, nakahibalo ako nga si Jesucristo buhi kag nagagiya sang Iya Simbahan paagi sa isa ka buhi nga propeta nga si Thomas S. Monson.

Mga kauturan, ang Dios nagapakighambal sa aton sa karon nga panahon. Kag luyag Niya nga ang tanan Niya nga mga kabataan mamati kag magtuman sang Iya pulong. Kon tumanon naton ini, ang Ginuo

magapakamaayo kag magasakdag sa aton sing maayo, alangay sa subong nga kinabuhi tubtob sa mga kalibutan nga magaabot.

LAMHARON

Gingiyahan sang isa ka Buhi nga Propeta

Ni Christy Ripa

Sang 16 anyos ako, nakahigayon ako nga magtambong sa pang-kabilugan nga komperensya sing personal sa naahauna nga tion. Ang akon panimalay nagapuyo sa nabagatnan sang Oregon sa Estados Unidos, kag nagbiyahe kami pa-Utah agud magtambong sa komperensya kag agud idul-ong ang akon magulang nga lalaki sa missionary training center.

Nagkadto ako sa komperensya nga may handum nga matudloan sang Balaan nga Espiritu. Bilang resulta, nakabaton ako sang pagpabatyag gikan sa Espiritu nga ayhan wala ko mabaton kon wala ako mismo naghanda sang akon kaugalingon.

Sa tion sang isa sa mga sesyon, ang tanan nagtindog kag nagkanta sang congregational hymn nga “Guide Us O, Thou Great Jehovah.” Samtang nagkanta kami, napadasig ako nga magtan-aw tan-aw sa palibot sang Conference Center. Ginhimo ko ini kag natandog ako sang gahum sang pag-isa sang linibo ka tawo didto samtang tanan kami nagakanta sa pagdayaw sa Dios.

Dayon nakaeksperiensya ako sa diin nakabatyag ako pareho kay Nefi sang makita niya ang palananawon sang kahoy sang kabuhi, tungod ang Espiritu nagsiling sa akon, “Tan-awa” (tan-awa sa 1 Nefi 11-14). Gintan-aw ko si Pangulong Thomas S. Monson kag nabatyagan ko nga ang pag-isa sa Simbahan nagluntad bangud ginagiyahan kita sang isa ka buhi nga propeta. Paagi sa pagsaksi sang Balaan nga Espiritu, nakahibalo ako nga si President Monson isa ka matuod nga propeta para sa aton nga panahon, kag nakahibalo ako nga si Jesucristo nagagiya sining Simbahan paagi sa iya.



Mga Anak nga Babayi sa Akon Ginharian

Tun-i ining materyal kag, sa nagakaigo, hambali ini upod sang mga sister nga inyo ginabisita. Gamita ang mga pamangkot agud buligan kamo sa pagpabakod sang inyo mga sister kag himuong ang Relief Society nga aktibo nga bahin sang inyo kaugalingon nga kabuhi.

Kita mga anak nga babayi sang Aton Amay sa Langit. Sia nakakilala sa aton, nagpalangga sa aton, kag may plano para sa aton. Kabin sinang plano nagalakip sang pagkari sa duta agud makatuon sa pagpili sang maayo batok sa malain. Kon pilion naton ang magtuman sang mga kasuguan sang Dios, gina-tahod naton Sia kag ginakilala naton ang aton pagka-anak nga mga babayi sang Dios. Ang Relief Society nagabulig sa aton sa pagdumdom sining diosnon nga palanublion.

Ang Relief Society kag ang iya sini kasaysayan nagapabakod kag nagasakdag sa aton. Si Julie B. Beck, pangkabilugan nga pangulo sang Relief Society, nagsiling: "Bilang mga anak sang Dios, nagahanda kamo para sa wala'y katapusan nga mga katungdanan, kag ang tagsa sa inyo may yara sang babayin-on nga pagkatawo, kinaiya, kag responsibilidad. Ang kadalag-an sang mga pamilya, mga komunidad, sining Simbahan, kag ang importante nga plano sang kaluwasan nakadependente sa inyo katampad. . . [Ang aton Amay nga Langitnon] nagtuyo sang Relief Society nga magbulig sa pagpasad sang Iya katawhan kag paghanda sa ila para sa mga bugay sang templo. Iya ginpahamtang ang [Relief Society] agud mag-ugyon

ang Iya mga anak sa Iya buluhaton kag ilakip ang ila bulig sa pagpasad sang Iya ginharian kag pagpabakod sang mga puluy-an sang Sion."¹

Ang aton Amay sa Langit naghatag sa aton sang pat-od nga buluhaton sa pagbulig pasad sang Iya Ginharian. Ginbugayan man Niya kita sang espirituhanon nga mga dulot nga kinahanglanon naton sa paghuman sining pat-od nga buluhaton. Paagi sa Relief Society, may mga oportunidad kita sa paggamit sang aton mga dulot sa pagpabakod sang mga panimalay, magbulig sa mga nagakinahanglan, kag magtuon kon paano magkabuhi bilang mga disipulo ni Jesucristo.

Si Pangulong Dieter F. Uchtdorf, Ika-duhang Manuglaygay sa Unang Panguluhan, naghambal parte sa pagkadisipulo: "Paagi sa mainantuon nga paglakat sa banas sang pagkadisipulo, ginapakita naton sa aton mga kaugalingon ang kada-kuon sang aton pagtuo kag ang aton kahanda sa pagbaton sang pagbuot sang Dios sangsa aton."²

Dumdumon naton nga mga anak kita nga babayi sang Dios kag tinguhaon nga magkabuhi bilang Iya mga disipulo. Kon himuong naton ini, makabulig kita pasad sang ginharian sang Dios diri sa duta kag mangin kaangay nga magbalik sa Iya presensya.

Pagtuo, Pamilya, Bulig

Gikan sa Aton Kasaysayan

Sang Abril 28, 1842, ang Propetang si Joseph Smith nagsiling sa mga sisters sa Relief Society. "Kamo karon nabutang sa isa ka sitwasyon sa diin kamo sarang makabuhat suno sinang mga balatyagon nga gintanom sang Dios sa [inyo]. . . . Kon mangin takos kamo sa inyo mga prebilihiyo, ang mga anghel indi sarang mapunggan nga mangin inyo mga kaupod."³

Nga ginakilala ang gahum sang Relief Society sa pag-alagad sa iban kag sa pagbulig sa mga indibidwal nga mag-uswag sa pagtuo, si Zina D. H. Young, ikatatlo nga pangkabilugan nga pangulo sang Relief Society, nag-promisa sa mga sisters sang 1893, "Kon magkutkot kamo sa kaida-dalman sang inyo kaugalingon nga mga tagipusuon inyo masalapuan, upod sang bulig sang Espiritu sang Ginuo, ang perlas nga may dakong bili, ang panaksihon sining buluhaton."⁴

MGA TANDA

1. Julie B. Beck, "Daughters in My Kingdom": The History and Work of Relief Society," *Liahona*, Nob. 2010, 112, 114.
2. Dieter F. Uchtdorf, "The Way of the Disciple," *Liahona*, Mayo 2009, 76.
3. Joseph Smith, sa *History of the Church*, 4:605.
4. Zina D. H. Young, "How I Gained My Testimony of the Truth," *Young Woman's Journal*, Abr. 1893, 319.

Gikan sa Balaan nga mga Kasulatan

Zacarias 2:10; Doctrine and Covenants 25:1, 10, 16; 138:38–39, 56; “Ang Panimalay: Isa ka Proklamasyon sa Kalibutan” (*Liahona* kag *Ensign*, Nob. 2010, 129)

© 2012 iya sang Intellectual Reserve, Inc. Tanan nga mga kinamatarong ginahuptan. Ginbalhag sa Pilipinas. Petsa sang pagtugot sa Ingles: 6/11. Petsa sang pagtugot sa paglubad: 6/11. Paglubad sang *Visiting Teaching Message, March 2012*. Hiligaynon. 10363 861

Ano ang Sarang Ko Mahimo?

- 1.** Paano ako makabulig sa akon mga sisters nga malab-ot ang ila potensyal bilang mga anak nga babayi sang Dios?
- 2.** Paano ko madapat sa akon kabuhi ang laygay kag mga paandam nga ginhataq sa kababayin-an sa Doctrine and Covenants 25?

Para sa dugang nga impormasyon, mag-log on sa reliefsociety.lds.org.